

Ministarstvo obrazovanja Federacije BiH krši Ustav izbjegavanjem preseljenja u Mostar

Vlada Federacije mora bez daljnjeg odlaganja ispuniti svoju dugogodišnju ustavnu obavezu da preseli pet ministarstava u Mostar, naveo je viši zamjenik visokog predstavnika Martin Ney u pismu dostavljenom premijeru Federacije Ahmetu Hadžipašiću.

“Obaveza ispunjenja ovog procesa proizilazi iz Ustava Federacije BiH,” rekao je ambasador Ney. “Ako situacija ostane nepromijenjena i ako se ne ispoštuju ustavni zahtjevi, visoki predstavnik može razmotriti poduzimanje odgovarajućih mjera u cilju završetka ovog procesa prije kraja ove godine.”

Pet ministarstava o kojima je riječ su: Ministarstvo trgovine i turizma; Ministarstvo za razvoj, poduzetništvo i obrt; Ministarstvo transporta i komunikacija; Ministarstvo energetike, rudarstva i industrije, te Ministarstvo obrazovanja i nauke.

U svom pismu, ambasador Ney podsjeća premijera na njegovu ranije preuzetu obavezu da će svakog ministra koji nije spreman da provede preseljenje pozvati da napusti Vladu.

Komisija Vlade zadužena da organizira preseljenje je već iznajmila odgovarajući uredski prostor u Mostaru, ali odgovornost za samo preseljenje leži na pojedinačnim ministrima.

Ministarstvo trgovine i turizma i Ministarstvo za razvoj, poduzetništvo i obrt su završili preseljenje. Ministarstvo transporta ima samo tri zaposlena koja se još uvijek nalaze u Sarajevu. Međutim, Ministarstvo energetike, rudarstva i

industrije, a posebno Ministarstvo obrazovanja i nauke još uvijek nisu preselili značajan preostali dio administracije u Mostar. Ministar obrazovanja Zija Pašić je čak sugerirao da u Sarajevu ostane "područni ured" koji bi bio mnogo veći od Ministarstva u Mostaru.

Preseljenje pet ministarstava u Mostar je zahtjev Vijeća za implementaciju mira koji je eksplicitno ponovljen u komunikeu kojeg su politički direktori objavili nakon njihovog sastanka u Briselu u aprilu ove godine.